

藝文

詩古體二十七

法華寺

唐崔國輔

松雨時復滴寺門清且涼此心竟誰證回憇支公牀壁
畫感靈跡龕經傳異香獨游寄象外忽忽歸南昌

三昧集

奉使宜春夜渡新淦江陸路至黃蘗館路上遇風

雨作

唐權德輿

草草理夜裝涉江又登陸望路殊未窮指期今已促傳
呼戒徒御振轡轉林麓陰雲擁崑端

一作雨當山腹



震雷如在耳飛電來照目獸跡不敢窺馬蹄唯務速虔
心若齋禮一作濡體如沐浴萬竅相怒號百泉暗奔瀑

危梁慮足跌峻坂憂車覆問我何以然前日受微祿轉

知人代事纓組乃徽束向一作若家居時安枕春夢熟

遵途稍已近候吏來相續曉霽心始安林端見初旭

按德輿詩雅正典贍而醞藉風流舊志載黃蘗館而

逸其詩茲從全唐詩補入

尚樂山宋武帝廟

宋楊震

溪聲答松風巨石出老拳古樹不知名岌岌蛟龍纏夕

陰互出沒秋華帶芳鮮葱葱帝王氣棟宇垂千年虎賁

秉霜戟慘淡生雲煙官人翠龍駕手持玉連蜷昌明坐

恍惚精神雷在天大呼司雍間旬月無秦燕昔爲萬夫

特今受衆目憐石馬亦埋沒歲時草芊芊小臣異代士

見之淚迸泉齊人思爽鳩蜀人哀杜鵑江東舊正朔禮

奉敢不虔但願君王心不忘載荻船下山又再拜白日

當空懸宋詩紀事

新淦太平山

元何中

縱觀不知遠言登太平山諸峯卷秋雨日射風霏間懸

新治縣志 卷三
磴折古石側溪倒危潺金燈如丹紅異卉相爛斑忽悵
經邛絕俄欣尋壑閒筠陰聚森爽樵人指幽關聲鐘出
唵靄演梵作孱顏靜者足吾契語瑩冰珊珊厓東野月
上露華膏夜鬢松杉炯玲瓏流飈過瑤環既靜有餘聽
焉知趺坐頑偶然在塵表非能悟無還

發新淦金水亭

元何中

振衣上野航回首謝山阪日淡秋水空風清片帆遠沙
光侵岸發峯影隨人轉前渡煙火深離亭路今緬
知非堂稿 以上

石洞雜賦

元劉詵

廬陵羅士奇都事葬母新淦石洞山水甚佳丙子
冬其姪履貞邀同游穿幽覓勝相與徘徊者連日
擇其景之尤佳者賦詩

石洞

蜿蜒辭夷皋迢遞陟穹巘綿綿千萬峯蒼秀入遙見既
疲猶穿雲小息仍下阪崎嶇到祠庵高檜挂日晚人家
繞稻田窅然復平遠園廬接煙火籬落散雞犬雖知非
仙源諒亦樂農畎卜居茲未能撫景徒繾綣

石溪

是日與郭德方坐溪石論文把酒忘歸

冬旱水愈涸微流行石間炯如玉璫窻屈曲相交關冷
然落幽罅隱約聞珮環擇石踞其高元元相對閒日宴
遂相酌持觴看青山疎雨作還止徘徊澹忘還

石泉

重巖括元氣雲竇出涌泉迸流絡廣石百尺高簾懸微
風度午日熒熒生紅煙始知窮幽討奇觀滿垓埏我友
趨奔鹿拳裳陟其巔蹇步獨竚屐矯想爲欣然瓢汲試
茶鼎庶足凌飛仙

和臨江饒自然夜坐

庭樹秋月高危葉光欲墮
孤蛩感涼氣唧唧稍近坐鄰
家弄機杼微燈出窻破
寢齋生新苔禪裯掩關臥
以上

桂隱集

奉和曾得之侍郎喜雨詩韻呈曹太守仲修聊致

田父感泣歸仁之意

元 鄒 說

行夏時已正仲春星復殷
方茲冠裳集再見俎豆陳
賢侯下車來司牧意良勤
朝犁勗野耕夜柝嚴微巡
蛇豕各奔竄邊隅靖煙塵
英俊極搜羅疲癯加撫循
遂令荆

棘墟化作桃李春緬想赤縣內廿載困妖氛安得百侯
輩錯置敷恩仁荼蓼自媻剪禾黍生意勻薄海盡堯封
含齒皆舜民風移運當復政美俗自淳覽此時雨篇益
知民物欣寄言栖遁者無爲久棄淪

竹莊集

贈郭郎中鼎貞還新淦

明金幼孜

客行辭國都眷言歸舊鄉舊鄉渺何許雲山浩茫茫念
昔當壯年與子同翱翔交誼等金石志氣相激昂青雲
幸際會喜得同朝行睽違屢契闊南北遙相望茲來遭
衰疾乞歸何匆忙荷蒙聖恩許感激切中腸悵然別我
去執手徒徬徨鴻鴈鳴索羣我懷增慨慷涼飈動蕭瑟
川陸悠且長及家遂閒適爲樂殊未央願言慎起處永
矢臻壽康

贈友人謝繩正還新淦

憶我卅角初攜書侍嚴父訪君滄洲曲握手遂良晤碧
梧挺高標金蘭托深契硯席幸有託寒暄同起處朋情
謝新益麗澤愜衷素悠悠金石交歷歷歲年莫東西各
驅逐冠蓋何由聚南宮忝科甲青雲忽高舉叨承侍從
榮出入誠何補今春別京國北狩隨鸞馭回望南天雲

遙睇故園樹憑高謾躊躇對景增延佇君從梁宋來邂逅慰羈旅天涯故舊情鐙前牢落趣時蔬薦新盤肴核侑芳醕劇談夜未央移席月當午但惜歡會難寧知別離苦攬袂聽晨雞候此秋天曙我復趨承明君還故鄉去鴻鴈正南飛商飈動砧杵分攜五雲館翹首金臺路望望不見君相思渺何許

以上文靖集

題黃彥成雲林小隱

明練子寧

有客素肥遯幽居愛林廬結屋依陋巷種樹繞城隅浮雲南山來清陰覆其間老柳帶寒色芳蘭露春腴窻深

不知曉樹密室自虛甘貧意所適守道樂有餘娛賓非旨酒飽食但圍蔬流水赴大澤翔禽戀高株物性各有遂誰能常晏如所以古人隱爲時而卷舒商嶺豈高蹈渭陽非遠漁惟有巢由子千載烈丈夫山鳴谷尙應已獨不受呼嗟我眼中人孰不爲利驅睠此雲林下蕭然塵鞅疎車馬塞里巷何能顧窮居寄語抱關者當識其賢愚

玉屑集

琴清爲胡若思教諭作

明釋如蘭

微飈灑練衣空庭夜寥泚涼葉生露華澄江上新月冲

襟澹無營孤桐絃白雪天秋萬籟鳴霜清百泉咽冥鴻
渡湘雲威鳳出丹穴至音聽者稀幽思自超越悵然一
長吟烏啼漏聲徹

支離集

一俊文學邀飲故村

明周所立

逍遙訪林泉短述良自哂白水注方塘新綠茁佳品梅
萼泛溪流宿麥被原畛緬懷廣平公芳澤久不泯斯文
卷情素易象發深蘊甕酌啟封泥盤餐饌新笋匣墨貽
元圭壁琴撫瑤軫登高一長嘯靈谷應虛枕回望夕陽
岑感佩志拳謹

冰壺續集

新修寺蘭室書堂題壁

明周謨

昔有釋門老超然脫塵纓所居僅盈丈揭扁蘭室名我
曾此讀書幾見歲月更別來三十年人逝室未傾矧有
湯休徒心靜跡亦清金篋刮眼膜炯然明雙睛邀我坐
蘭室孜孜話無生殷勤洽款語宛有平生情酌我以香
醪享我以大羹感此意氣嘉欲別仍畱行題詩就石壁
匪報日瑤瓊

東臯集

玉笥山

明胡儼

佳哉古淦邑有山鬱岌昔年降玉笥芳名標神霄有

峯高插天芙蓉金柱翹有壇布碧落太乙皎素綱有臺
高巍巍九仙東華朝有洞實靈闕白日聞笙簫陰瀑灑
飛雨石磴凌風颺艷艷金光草森森琪樹標仙人散綠
髮乘晨希松喬流輶宴初景元挺披氛囂龍吟石澗隱
鳳歌雲路超仰嗽金髓溢流盼恣逍遙我欲從之遊黃
鶴不可招悵望白雲深郁木何幽寥

顧庵集

覽勝樓詩

明費宏

坤輿浩無垠眾卉自環植魏紫與姚黃葳蕤鬪顏色桃
李雖無言蹊下能紅白豈不羨春華秋來自寥寂惟松

獨也真後凋著聖經盛夏與隆冬青青自綿幕陰生古
石苔色映寒煙碧道人性孤耿正與其松適環庵近萬
章參天已千尺琴彈松裏風醉枕松根石松葉可樵蘓
松花可啖喫行年踰六十素性無移易伊昔商也賢杏
壇幾昕夕紛華一入目心戰異肥瘠何時似此翁乃能
屏華飾一點淳樸心分明自天得豈是赤松子塵遊本
無跡

友愛堂詩抄

送饒湖田夫子叅蜀藩

明楊巍

沂水淹真詠孔壇歇聖音爰有金川雋求度古人心淬

行雙白壁摘思千黃金秋飈捲囂霧朗月揭虛襟整駕
西川去吾道更誰任

嘉會堂詩抄夢山集

挽涂侍御正

明高貫

山查本多棘有實亦見採芝蘭徒自驚鋤艾誰憐愛自
出閨門來貞潔誓不改糟糠絕甘美荆布棄華彩夫君
索資裝貧窶無以解媵婢恃權寵逼迫日譖毀廢置覆
盆下豈復勝楚篋舉頭訴彼蒼聽高如耳曠含淚下泉
扃獨留名節在未知董狐筆肯以公道載

舊志

劉貞女詩

明梁寅

客行金川野路傍見松門亭亭立雙柱聳聳干層雲大
書字徑尺云是貞女墳下馬問居人居人爲客言里有
劉氏女既笄字懿文父兄乃文儒異彼麓豪民女賢在
房帷旣許趙氏婚秉心若冰玉計功惟織紉一朝風塵
起盜賊遍墟里兩兄從義兵兵敗乃俱死父母哭晨夜
賴女能慰止時危日月昏民亂波濤靡驚鳥欺鳳雛聚
獸乖麟趾所競惟金多所悅惟色美不諒貞女心強取
悖倫理刻期求必遂父母焉得已女言我此軀寧受強
暴汗趙氏旣我聘他人非我夫瓦完何足貴璧碎終自

殊我在世所謂我死親無虞竟投百尺井深泉若安居
隣里哀莫救兇悍聞之吁皇天恨高誼后土憐中孚女
節士或愧士辱女不如客聞悲且惻歎息重歎息惟天
生人物人物具天則王雖有定偶孤鴻不改特獨歸燕
循義耿介雉之德人既靈於物綱常待扶植况聞多篇
章備述貞女蹟縣官合表閭太史當採擇名借竇氏女
永永世千百

石門集

蕭氏雙節詩

明劉繪

蕭家兩新婦孀居各妙年此身矢不改願比金石堅姑

云新婦來是妾夙昔緣大兒既不幸小兒尋亦隕門卑
難留爾乘此顏色妍兩婦拜且泣心中大不然良人雖
云沒終當見重泉豈不奉姑命人生無二天姑聞語哽
咽撫慰良足憐我豈奪爾志我老疾病纏且夕且不保
新婦恃何全姑死婦亦老鄉稱阿母賢縣官初視事風
俗由爾先走吏告天子旌書下南阡至今淦江上白日
高名懸

嵩陽春詠

胡氏雙節

併引

明周謨

中洲胡進用余忘年友祖厚德考懋功俱蚤逝祖母

會母孺皆年二十而寡姑婦砥礪堅貞粹如時以雙
節稱之且善理家政誨諸孤以成立進用每念及二
母輒潛然淚下爲賦雙節詩一以備觀風使之采錄
一以慰進用之哀衷云爾

淳風益已散古道多秦蕪一門見雙節况是婦與姑姑
以死自誓堅貞恒自如婦節良亦苦皎潔秋月孤世情
轉衰薄萬事堪長吁女中獨何幸得此雙瓊琚吾將白
大史特筆爲爾書書以告天子終當表其閭

東臯集

發清江至新淦

國朝

施閨章

官程難息駕日昃命征夫征夫行躑躅積雨泥我塗旱
久始霑足田家歡有餘新禾多秀色四野何敷腴苗成
草亦長農叟無芸鋤登場欣一飽薄獲罕畱儲瘠土民
不勤毋乃非良圖誰能式幽風使我百憂紓

愚山集

泥溪口枕上聞鴈

國朝

查慎行

陽鳥踰彭蠡飄飄向南飛晨光若前導羣起泥江澹數
聲枕上過傾耳漸入微彼非我同羣安得相追隨我帆
十二幅取用常半之何以不用全波濤怕歎危下有無
底寶旁有不測磯身乏雙羽翰爭先復奚爲汝往大急

急吾行故遲遲茲遊到嶺南諒亦難久羈歸時倘見待
入春以爲期 敬業堂集

題胡祚修玉筍白雲圖

并引

國朝

孫之鳳

圖自若思先生始繪而地之奇勝悉系以詩同時金
楊諸公俱有賦序年久圖亡所存者賦序與詩耳先
生之孫祚修不忍湮沒繪圖輯文邀余同玩其仁孝
之思感人殊甚因忘謏鄙率賦一章誠不知其發揮
爲何似也志附圖後總求一噓

我先亦出峽峽實淦之半玉筍矗其間先人常念眷胡
公永孝思繪圖虞世變云此先人邛罍罍多可羨地脉
眞秀靈英賢產無算當年聖天子咨嗟羅邦彦同里金
與楊一齊趨閣院人皆以爲華公心獨無戀急流思勇
退懷我本源便雲木甚參差江山恣奇幻對圖思邈然
渾如朝暮踐同官美斯本競觀齊賦徧詩長句短句章
一亂兩亂珍重貽後人流傳久失散屬有象賢孫蒐羅
性情慣幽居閉小閣手筆不離硯念茲世澤遠奈何忘
一綫特輯後先文復開山水面畫師忻踴寫名篇亦珠
貫延客展新圖坐者背沾汗我初與君友實爲愚且賤

今老無能爲君情猶繾綣發憤續前修慙勤咨劣撰才拙語不馴總因仁孝見陵谷有更遷幽堂無易換君今一凜崇奕禩應勤玩有竹園集

過楓岡龍鍾庵訪孫生允恆

國朝 陳希獻

一筇平地來漸上山百尺維時屬暮春田家刈新麥風日正清和單衣輕且適野花笑嫣然山禽啼磔格飛瀑濺珠璣怪石削瑤壁踏破白雲層倚杖紆喘息初不減少年終然費脚力舉首視上方樹杪炊煙織長策一聲來掖手相慰藉謂自有此山得無此嘉客曲曲徑還

禪房亦修飾懸崖構重樓品泉淪嫩碧青衫雜袈裟貝

葉連典籍

允恆在庵誦習

清淨道心生塵襟頓欲釋憑欄遠縱

觀名蹟數歷歷吾力不從心欲往倩誰翼開樽出斗酒

豪飲過疇昔山僧無俗情相對陶陶夕挑燈共手談

時同

學王子

連牀話詩律老子興不淺欣然起捉筆五字細

敲推恐負此泉石還以質公和一顧昂其值龍虎紀歲

時雪鴻畱爪跡他年倘無恙欣賦後赤壁

次沙集

瞻江樓

國朝

董謙吉

楚嶺開雲岑章流發香芷飛筍躡仙鸞長江帶金水巖

城百雉雄畫閣連霄倚萬瓦寫魚鱗雙龍翔戶綺時見
渡江人靜俟寒潮起遙天襯斷虹黛色青難已柳密隱
漁汀濤平躍頰鯉賦擬廬山咏鏃拾吳王壘澄懷念屢
空憑高惜良晷講論有羣儒趨蹌躡朱履登樓發遐唱
應染芙蓉紙

舊志

讀書臺

石壁垂山椒今古春雲駛爲憶千秋人澄懷照江水披
草出荒臺何處尋霞屺舊址在金川欲使斯人起我愴
烈士心惜陰寶寸晷尺練化龍梭虎視回天璽難酬封

鮮懷何用溫嶠指讀書如士行夫豈章句止夾岸滿溪
毛誰爲薦芳芷聞孫掛印綬高咏粲清美天地產名賢
斯臺應不圯

同上

楊蘭畹移居分韻得五言古

國朝

王泰姓

明月淨於水夜色何迢迢文譙落新室紛至不待招圖
史旣羅列揖讓逾高標退食且謀歡橫笛間短簫擘牋
出秀句五字如瓊瑤羣彥集同里故廬成客寮開樽期
數飲况復近元宵

知稼軒

歲暮懷李梅情作相

國朝

盛樂

慘慘女貞花冷香不堪
浥不愛春風妍長有好枝葉深
谷少行人光影自相接

江西詩徵

後懷人劉吏部幹齋

國朝

蔣士銓

三十黃巖令手築黃巖閘
長隄截波濤蛟龍不敢狎
馮唐老爲郎崢嶸掌選法

忠雅堂集

小廬山

國朝

胡之瑾

廬山肇山經非始自匡俗子
孝生而神有仙山更馥淦
北挺奇峯如浪偏天浴
差比廬峯小靈氣亦清淑
登山魯始卑陟岱宇方促
茲山屹砥柱其勢若尊獨
笑彼桃

溪人莫遣漁舟速勿嗟山徑迷
劉郎前度熟村民牧且
樵野客耕還讀聖學本無小
吾茲慕白鹿

讀陳次沙七賦詩并題其後

集富次沙居名

我家武溪頭君家瓦橋麓
艤舟泊橋西入訪村徑熟
竹影靜塵歆樟陰泛濃綠
中有愛蓮客怡然盼庭木
南畝事躬耕高岡時極目
得句每驚人長歌嘯空谷
溪漲走長虹持竿餌魚腹
借問酒家誰取醉幽懷馥
未知家計貧祇慮莊名俗
手貽七賦編言洗集富辱
吾聞百世師高枕隨肱曲
簞瓢與繩甕淵憲坦然足
貧非君子憂富

本羣情欲忘憂果孰能寡欲欣君獨弗受利名羈豈聽
乾坤束笑彼孳孳者浮生終碌碌

以上武夷詩集

暮春示同學

國朝 王士俚

性僻愛幽居寒氈棲淨土經義餉諸生丹黃甲乙部典
學惜分陰進退嚴步伍匪云師道尊曷哉肅規矩生意
草不除悅樂勤稽古望雲陟高岡蒼翠落村塢金水駿
以奔銀罔蹲如堵憑眺儘怡情浮雲何足數躡履下山
坡青疇植新稔日暖蜂排衙池靜蛙鳴鼓羣鶯盡意啼
雜花空自舞春日趣多佳聊樂得我所

寄開草

十月望日爲玉筍之遊三湖問舟

國朝 錢時雍

結侶訪名山清曉戒行李渡江涉汀隄繞邨拂煙藟柑
林鬱青葱楓徑寒丹紫村市俯津流舟艇列江渚拂拂
微風生適意帆堪理長年彼何之孤棹頻徒倚蒼茫雨
欲來甜睡甯未已日暮天冥冥一笑且棲止

小泊淦城訪董明經逢昌

碧眼柳垂堤長鬚麥被坂一掉澹容與夕陽明晚晚返
影射浮圖山城應不遠小泊傍沙汀訪舊叩庭院芳樽

復款洽新月陟高巘

以上寄圃詩稿

讀書臺懷古

國朝 劉佳瑋

三啟讀書臺前賢畱勝跡所志各有在萬卷供朝夕登
覽借山川懷古紛如積隔寺一聲鐘江流天外碧

聿修

堂續稿

詩古體二十八

亞元舍人不替深知猥貽佳作三篇清絕不敢輕
酬因爲長歌聊以爲報未竟復得子喬校書示
問故兼寄陳君庶資一笑耳

唐 徐鉉

海陵城裏春正月海畔朝陽照殘雪城中有客獨登樓

遙望天邊白銀闕

天帝以黃金白銀爲宮闕

白雲闕下何英英雕鞍

繡轂趨承明闈門曉闢旌旗影玉墀風細佩環聲此處
追飛皆俊彥當年何事容疵賤懷鉛晝坐紫微宮焚香
夜直明光殿王言簡靜官司閒朋好殷勤多往還新亭

風景如東洛邨嶺林泉似北山光陰暗度盃盃裏職業
未妨談笑間有時邀賓復攜妓造門不問都非是酣歌
叫笑驚四鄰賦筆縱橫動千字任他銀箭轉更籌不怕
金吾司夜吏可憐諸貴賢且才時情物望兩無猜伊余
獨稟狂狷性褊量多言仍薄命吞舟可漏豈無恩負乘
自貽非不幸一朝削跡爲遷客且暮青雲千里隔離鴻
別鴈各分飛折柳攀花兩無色盧龍渡口問迷津瓜步
山前送暮春

去年三月三十日瓜步阻風

白沙江上曾行路青林花

落何紛紛漢皇昔幸回中道

昇中扈駕東元遊之路

極目牛羊臥

芳草舊宅重游盡隙荒故人相見多衰老禪智寺山光
橋風瑟瑟兮雨蕭蕭行杯已醒殘夢斷征途未極離魂
消海陵郡中陶太守相逢本是隨行舊乍申拜起已開
眉却問辛勤還執手精廬外榭最清幽一稅征車聊駐
畱閉門思過謝來客知恩省分寬離憂郡齋勝境有後
池山亭茵閣互參差有時虛左來相召舉白飛觴任所
爲多才太守能撾鼓醉送金船問歌舞酒酣耳熱眼生
花暫似京華歡會處歸來旅館還端居清風朗月夜窻
虛駸駸流景歲云暮天涯望斷故人書春來憑檻方歎

息仰頭忽見南來翼足繫紅牋墮我前引頸長鳴如有

言開緘試讀相思字乃是多情喬亞元短韻三篇皆麗

絕小梅寄意情偏切亞元詩云借問小梅應得信春風新自海邊來此篇尤嘉金蘭

投分一何堅銀鈎置袖終難滅醉後狂言何足奇感君

知己不相遣長卿曾作美人賦元成今有責躬詩鉉去春醉

中贈醉妓長歌酷為喬君所賞來篇所引故以謝之報章欲託還京信筆拙紙窮

情未盡珍重芸香陳子喬亦解貽書遠相問寧須買藥

療羈愁只恨無書消鄙吝子喬問藥物所要又問置書故有此句游處當

時靡不同歡娛今日兩成空天子尙應憐賈誼時人未

要嘲楊雄曲終筆閣緘封已翩翩驛騎行塵起寄向中

朝謝故人為說相思意如此騎省集

題曾無疑飛龍飲秣圖曾名三異號雲巢臨江人

宋戴復古

雲巢示我良馬圖一騎飲水一騎芻竹批雙耳目搖電

毛色純一骨相殊何人貌此真權奇筆端疑有渥洼池

駑駘當用驂騑老羸得畫圖人看好盆中飲槽中秣無

用霜蹄空立鐵何如渴飲長城濠上波饑則飽喫天山

禾振首長鳴載猛士龍驤踏碎胡虜窠石屏集

送龔舜咨南歸

元劉闕

楚山之人愛山成癖况住逍遙之墟明月之室頃者乘
風偶然出玉堂羣英盡相識爲愁巖下曉猿驚拂袖歸
來對山碧碧山岩巖千仞低上有蒼蒼倚天之松檜下
有潺潺一道之長溪虎牙森石齒自古無輪蹄問君何
年闕此境絕似謫仙之所栖山前草屋門前樹漁樵共
占煙霞住暮雨飛從峽口來桃花流下清江去清江兩
岸山四環我嘗遠訪葛洪之丹井頗與羽衣相往還山
人雜佩風珊珊獨騎鯨魚扣仙關萋萋十八澗邊草聞

有樓臺無路攀薊門秋高鴻鴈過萬里題詩薜蘿間薜
蘿間隔萬里山中雖樂不可以久留胡不相隨鶴書起
元詩抄

題夢鶴軒圖爲淦守曹仲修賦

元劉永之

綠髮仙翁宮錦衣十年淪落江之湄扁舟傍夜弄明月
夢逐西風孤鶴飛孤鶴西飛渡江渚星斗沈沈遠山曙
逸思騫騰八極雲霜毫點染三秋露梁園才子蘭臺賓
露幌行春移畫輪未論羽翼冲霄漢直道襟懷如古人
山城休暇多賓客共展軒圖綺軒側一曲寒波照縞衣

新治縣志
卷三十一
坐令長憶林皋宅

山陰集

題盤谷圖

并引

廬陵郡幕賓盤所李君字長翁家藏盤谷圖非必盤

也
俗志隱耳爲賦長句

元劉詵

千厓蒼蒼倒石懸老檜下瞰空闊森白根上有縈絡斜
下之瀑泉下有縹緲半出之窻軒忽然漁舟散浦激疑
是秦人桃花之仙源叢林盡處長堤繞柳外沙邊行客
少汀煙漠漠不成雨汀樹疎疎似飛鳥依稀水檻知誰
家疑是唐人洗藥之溫沼問君此地何處尋可買不惜

捐千金君言此亦盤谷境我已先從畫中隱嗟君才氣
何堂堂胸藏霖雨未八荒平明走馬入黃閣日晏文書
紛鴈行戔戔奎章九天上白日旌旗下仙仗秋風插翮
高頡頏雖有此境何由往丈夫英氣多難攀九環寶帶
懷青山輞川墅龍門灘會買青鞵待君還
襄城楊將軍伯謙席上分韻得玉字

桂隱集

元鄒說

使君才名冠南服三十專城面如玉四葉金章被寵光
萬卷戎韜繼芳躅論兵寧肯後孫吳拓境終期用頗牧

韓信登壇節鉞高亞夫開闔轅門肅承平政府多閒暇
羽箭在旁弓在韞散騎春營萬柳青呼鷹秋野平蕪綠
傳籌擊鼓送飛鴻式宴娛賓賦鳴鹿錦字來看閣老詩
饒歌譜入詞人曲四垂寶幄照璫瑜百罰金杯汎醴醪
翠娥歌罷停綠雲錦瑟彈成怨湘竹丈夫功名須及時
亦有微詞願相祝莫言此夕懽樂多銀箭沉沉漏聲促

送何思恭歸高安

憶昔州城繁盛日雕楹繡戶施金碧買地爭移洛苑花
量珠更致平泉石青春冠蓋如雲萍撞鐘伐鼓紛相迎

豪士居閒推郭解貴游虛左禮侯嬴芳年意氣稱賢掾
千金一諾同高宴醉後從教浣錦茵詩成乞與題歌扇
風塵回首豈堪論臺榭荒涼不復存坏土何人收駿骨
一尊誰與酌英魂廿載間關幾人在逆旅重逢增感慨
夜雨偏令白髮生秋風解使朱顏改明朝買棹滑湘濱
布衣歸臥錦江雲爲言泛宅煙波客恐有羊裘垂釣人
竹莊詩集

雙忠廟歌

明 鄒瑄

二公遺烈在江淮何事明禋淦水煙古今天地無差忒

新治縣志 卷三
灑氣正性與之偕將軍劍氣騰龍虎大小風雲戰塵苦
猛士愛妾不俱生唐室中興在靈武三日而救至七日
而賊亡二十四郡迎降者安得芳名萬古長東山業業
潛水湯湯廟貌如故榱桷不光誰爲加丹雘仙令舊河
陽德厚功高相媲美千秋萬禩祝庚桑 舊志

夏日有懷冰壺先生諸君子榮膺峻擢給事六曹
青雲之交邈在天上今退歸田園謝軒冕之榮
養煙霞之疾僕以家居孤苦今幸得與先生托
布衣於田野此樂何可多得乎遂作懷舊遊一

篇

明黃 桀

我本悠悠布衣者有生托拙衡門下窮經致用未成名
謾與同遊結蘭社同遊三五皆英才揮毫落紙春雲開
幼輿適意在邛壑太白陶情向酒杯承平江南好風景
日日溪山恣遊騁有時醉上百花臺萬壑松聲吹不醒
官田十頃水芙蓉五月人行雲錦中畫船幾度載明月
臥吹鐵笛招天風浮雲聚散今悲昔鷓鴣分飛各離翼
錦語羣從紫府書繡衣又上金門直金門九重青鎖牕
從官多是紫薇郎玉皇舊著絲綸手池上於今有鳳凰

先生本是攀龍客曾入中書揮翰墨當時筆陣掃千人
畱得芳名擅京國鳳樓五彩鳴朝陽花飛玉溝流水香
聖人端拱大明殿捧敕曾親日月光去年謝病歸來早
獨向山中拾瑤草浮名身外不相聞杖履逍遙可終老
今年讀書寒水坳山深好結松雲巢陶潛已作松菊主
杜甫更話桑麻交蹇余未了丹霞望笑談風月滄江上
緬懷漢朝司馬公歷覽山川事長往聞道茫茫寰宇中
盛時混一車書同東南海水幾千里西北雲山百萬重
何當與子同尋訪登彼高邱睨溟漲太乙蓮舟一葉輕
謝公蠟屐三千兩平生不爲兒女憂思憶故人無限愁
暮雲春樹起遐想一日不見如三秋人生窮達天所與
自古英賢隨出處雲臺彩繪漢功名嚴陵終釣桐江水
吁嗟世事等浮漚眼前日夜長江流青山亭亭不改色
獨與乾坤相久畱作歌寄君歌慨慷六月冰壺秋水朗
古人明哲可保身君子相期道多長

按漁洋詩話載體方七律數聯惜佚全篇古體更不
可得茲從宋氏後人所藏冰壺遺稿錄出七言長古
一篇卷帙完好列之藝文志

康浪山歌

明周所立

康浪歌鯨鯢振鬣揚洪波天子親乘六龍駕樓舡巨舸
高塞峩翠華搖搖懸日月左秉白旄右黃鉞縱橫大戰
數十圍錦浪翻紅漲腥血敵常脂葦張毒氛北風反火
輒自焚焦頭爛額沉波裏奄忽高飛水上軍山爲組兮
水爲練自古英雄無此戰威聲振撼馮夷宮殺氣奔騰
龍伯殿康浪水康浪山霸氣奄忽煙焰間鼉鼉蝦蟇總
淪沒猱獠梟獍無生還軒轅指南輾飛轂康浪坐令爲
涿鹿小鯢中身赴鬱攸大鯨左目中箭鏃我皇笳鼓震

溟洲凱歌歸奏丹鳳樓降軍十萬散海浦太白曉掛蚩
尤頭康浪山康浪水王業艱難自茲始海宇清平垂萬
年敬獻頌歌繼青史

汾上續談

次韻周所立康浪山

明張美和

先生擊節康浪歌歌聲激烈揚洪波平湖萬頃煙漠漠
斷岸千尺雲峨峨憶昔卯年秋八月天子親征乘黃鉞
樓船遠列鴈鴈行舂杵新漂猩猩血北風吹雨洗惡氛
中流一決巨艦焚虎賁何止三千士龍驤直擁百萬軍
王師無敵精且鍊笑彼區區赤壁戰組甲光搖鮫女機

旌旗影蔽波神殿康浪水康浪山千載功名頃刻間
夜月湖中鼓吹起秋風江上凱歌還天旋日轉回輦轂更
向中原逐麋鹿豈無詞臣勒穹碑時有漁人拾遺鏃我
來艤棹山前洲爲訪陳迹倚樨樓鳥飛欲下湖天未潮
來不打湓城頭康浪山康浪水請敍戰功從此始君歌
我和意何長留與他年作詩史

東遊倡和集

玉山謠贈時憲

明練子寧

我所思兮玉山之岵巖粲芙蓉兮凌青霄謫仙一去已
千載至今誰續廬山謠熊侯家住劍江側慣掃秋山之
黛色聞余此興爲寫之彷彿梅仙舊時宅梅仙兮何在
邈清風兮滄海蹇夷猶兮孤舟弔遺跡於千載舟中所
載非凡流羌故人兮李與周按玉笙兮明月下黃鵠兮
清秋洞天兮石扇蒼崖兮路轉橫余劍兮視八荒訪蓬
萊兮幾清淺張侯兮昂藏驂白鶴兮青霓裳窺玉梁之
寶笈醉石髓之瓊漿千巖萬轉路莫測酒酣一笑三山
窄待得君王賜鑑湖錦袍重訪山中客

樵谷歌爲雙峯饒子宏賦

金川南上佳山水翠壁丹崖相對起玉山三十六芙蓉

都入樵翁笑談裏藤蘿縛屋薜荔衣朝往青崖曛暮歸
松陰遺世時高枕谷口行歌日看棋昔年我作金門客
素衣半化緇塵黑當時挂笏望西山始信漁樵不輕得
今年奉敕又朝天手展詩囊索贈篇移文未許山靈誦
伐木終期友道全丈夫出處須知命軒冕山林總天定
他年我亦謝官歸遲爾長饒綠蘿逕

三月望日與饒隱君子宏遊玉笥山

我懷謝康樂獨往遊名山身同虛舟繫心與浮雲閒清
風澹蕩灑六合令我興在雲松間玉山高與南斗齊雲

錦照耀廬山低三十六峯靈虹霓飛湍噴雪臨迴溪長
松挂月青猿啼上有梅仙採藥之幽棲下有蕭雲讀書
之故基洞天石扇杳莫測瑤草漫長三春莧我欲因之
覽八荒手拂青蘿眠石牀回飈吹散碧天霧清冥倒瀉
澄湖光偶爲玉山謠寄之雙峯客興來攜妓秋復春笑
殺東山謝安石

水竹居詩

高人結宇修篁裏軒戶玲瓏瞰流水庭臯月轉翠陰生
溪上風回青浪起翠陰青浪映窻扉曲徑苔深客到稀

林下移牀揮麈坐沙頭繫艇釣魚歸柴門無事臨流做
高臥支頤聽清響千山暮雨石泉通一夜春雷籟龍長
几席清幽俗事疎波光盡日映圖書何年得遂辭塵鞅
杖策相從此卜居

待月歌

并引

昨夜露坐東山停杯待月俄而桂香西來皓月東上
清興灑然殊有塵外之想遂成短歌一章馳寄一二

同志

天風吹桂香夜久露華結清興誰與同停杯待明月明
月須臾海上來青天一望無塵埃人看明月皎如昨月
照人間知幾迴人生何用嗟興歇月本無心尙圓缺玉
兔搗藥能長生不管麻姑鬢如雪月既照我飲我且爲
月歌舉杯勸月月亦喜清樽歷亂揚金波願把紫鸞笙
雙吹向寥廓直上蓬萊第一峯坐聽霓裳奏仙樂

以上
玉屑集

贈傅子楫德安教授

明
金幼孜

京師仲冬月天氣寒栗冽客懷已無歡况與故交別先
君昔教臨江時我亦攜書侍講帷春風游泳泮池上惟

君與我最相知君心磊落懷奇寶自分青雲致身早一
從領薦上京華拜官得似儒官好蘄州振鐸經幾年廣
海旋聞席再遷樂城契闊三載餘又聞書考來朝天相
逢頓覺容髮改却羨當時好風采論心但喜別懷舒話
舊猶看故情藹只今南去沐恩榮盡道德安風俗淳朝
回相送情怱怱作詩聊以伸殷勤征車軋軋金臺路落
日風沙渺煙樹人生聚散胡爾爲况乃相逢各遲莫君
行遠道勿蹉跎正值歲寒霜雪多德安早到如相憶莫
道衡陽無鴈過

何將軍山林圖詩

有序

同邑何叔安所居在金川之潭溪左右皆佳山水因
追慕何將軍山林乃命畫者爲圖而求余作詩其上
遂爲長歌一首以寫其山林之趣且以徵後會云耳

詩曰

寰中山林無處無奚獨將軍名最都不因工部有佳句
後人那得知其故金川玉峽秀且奇潭溪更在金川西
將軍奕世遠孫子繼承文采尤光輝名園綠水南塘麓
第五橋邊富修竹眞宰何年驅六丁掇取靈區過潭曲

石欄點筆聽流鶯銀甲金魚舊日情四時佳致宛猶昨
一段勝景真天成何郎意度尤瀟灑貌取山林入圖畫
朝來訪我歡相持索我題詩說鄉社臨風濡毫爲寫之
却憶故山勞夢思濠梁谷口未應遠白雲流水還相期
明當乞假向天子錦衣快着歸鄉里預擬山林作勝遊
馬蹄踏徧煙霞裏

以上文靖集

送太守盧玉潤還新淦展墓

明宋一俊

薊門十月多北風道上垂楊枝已空離筵呼酒勸行客
酒杯有盡情無窮盧君自是同鄉里况復青雲托知己

選部曾推深鑑明朝端共說才華美一朝承擢守錢塘
朱幡皂蓋生輝光布宣德化耐繁劇撫字黎庶多慈良
是邦從昔稱難治閭井欣欣樂君至數邑豪強自斂蹤
海濱赤子無遺利政成九載復朝天喜得論心向日邊
九重奏績策書最萬里承恩楚賦還匆匆話別臨長道
昨日紅顏總衰老風前鴈影去人遙馬上狐裘覺寒早
南上歸舟莫大遲梅開定是到家時鄉中故舊歡迎處
應歎昔遊今若斯歸榮晝錦誠堪羨桑梓情深難久戀
明年八月候趨朝五雲深處重相見

題熊所望畫鄒幼亭山居圖

老兄盛世身安逸煙霞笑歌寧跼蹐詩句曾畱博士題
畫圖乃是崇文筆幽居正在山之西紛紛五柳當簷齊
崇文妙手最知已檢點景物分毫釐青壁丹崖聳層巖
蒼松怪石封苔錢窗外白雲舒復捲階前流水清且漣
芝蘭遶砌齊開花客來相見從喧嘩銀杯飲盡白蠟酒
冰盤獻出青門瓜課兒讀書臥不出曲徑藤蘿陰鬱鬱
千章古樹半栽梅百畝平田多種秫此中真是隱者居
鹿門商山俱不如去年詔下搜巖穴徒勞使者來安車

我願與君同攜手幾載投閒不常有賞心樂事究何如
再索崇文畫三友

歸田後黃體方以詩見寄體方與余輩二十二人

同徵到郡獨以父喪未滿放回因酬原韻一首

嗟余原是悠悠者數椽茅屋青山下平生慣識牛羊村
四時願入雞豚社前年詔下需洪才忝列羣英眊矐開
縣公汲井甘爲綆郵亭餞別黃金杯當時同載樂清景
笑談豈爲誇豪騁片帆瞬息到清江坐對月明殘醉醒
黃君苦塊苦匆匆願往深潭伴老龍多謝太守辭歸郡

獨聽山林古寺鐘辭榮返權殊夙昔歸寧恨不聯雙翼
羣英相別赴天衢各向金鑾殿上直少年未可困芸窗
每日逐逐紫薇郎聯鑣奮翼隨鴛鴦勝在高梧引鳳凰
粉署已滿三年額常向右軍求筆墨喜從僊仗擁千官
飽看車書來萬國禁城春暖鶯啼早玉驄夜食瑤池草
蹇余病臥三月餘困苦場中人易老白晝夢遶林塘均
南望山中由與巢聖恩忽賜歸田野至今猶憶青雲交
青雲交處慰人望榮膺給事頌天上長安日日退朝回
花底香車恣來往黃君大隱城市巾風流瀟灑孰與同

興來按調山水合醉裏牽蘿紫翠重去年九月曾過訪
幽居老樹晴雲漲自言泉石久結盟何須鍾乳三千兩
男兒志大百無憂故人遊宦翻成愁青眼相看論古今
江天漠漠江楓秋別來那得重相與陋巷茅簷甘自處
有時杖屨過青溪一葉漁舟釣煙水人生渾如水上鷗
飛來飛去幾時休百年荏苒都如此柳蒲豈能長久留
我歌此詩慨仍慷知君心鏡明而朗何當更造方壺間
嘯傲乾坤論消長

題何原潤東閣舊隱

何君習隱開東閣彷彿揚州舊時作當時詩興在觀梅
官職聲名宛如昨家君鼻祖居城東譜牒正與揚州同
後來嚴親贅沂水遠邇流傳曾氏宗知君原是水部裔
水部淵源與人異文采風流自不凡生稟乾坤足清氣
窻前况植花之魁冰肌玉骨無纖埃有時烏帽醉來插
座中賦咏皆雄才我昔從容訪湖上綠水名園兩相向
秋堂還有讀書聲不減將軍舊豪放平生快意誰與儔
好從勲業追前修白頭未許老巖穴天書早晚來徵求

送姚伯良之金城

姚君家住金川側早歲才名動鄉國清江太守頗相知
飛書薦作朝天客桃花三月錦帆開飄然直上黃金臺
黃金臺前親射策天子一見奇其才虬髯如戟氣如虎
玉立身長衣楚楚時賜鹽官不肯爲特領金城求盜使
金城千里去路遙巨鎮所屬當蜚徭鐵騎穿雲山歷歷
寶刀耀日風颼颼君今此去別鄉土我欲畱君君不住
豪來拂我雙龍泉醉眼摩挲爲君舞爲君舞共君語莫
遣年華負壯心好事業降殘虜楊柳條柔晚帶煙桃柳
樹老朝含雨巡邏歸來揮彩箋因風好寄梅花邊廣西

親治縣志
驛道多歸使莫令悵望心悠然

以上冰壺集

天柱岡

明胡儼

當天削出芙蓉青雲中一樹屹不傾蒼然不改大古色
直與華岳爭崢嶸紫虛真人有琳館琪樹千章花纂纂
青鸞劃下絳桃開白鹿鳴時瑤草短真人飛珮夜降臨
火鈴撒地流黃金赤松吹笙白虎嘯玉斧鼓瑟蒼龍吟
颯颯清風動林藪月光如水山靈走麻姑忽報王母來
笑挹瑠漿斟北斗羣仙高會良難遇我醉欲眠呼不去
滿身祇覺露華涼山鳥初啼谷將曙歸來人世幾星霜

竊祿空慚兩鬢蒼何時騎得遼東鶴還向岡頭問故鄉
若思集

贈黃道士還九官山

明曾魯

我家羣玉山南陬君家蒙頂最上頭相望欲識嗟無由
搖搖心若風中旂君從少年慕遠游麾斥八極隘九州
下視起滅如浮漚九官山高明翠蚪真牧之子世莫儔
君居其間業清修五十餘載無悔尤翠華昔駐鸚鵡洲
承恩召對黃鶴樓敷陳屢荷天語酬大官醉以白玉甌
去年弓旌復旁搜麻屨徑入朝冕旒神皋繁麗不肯畱

遷山日夜稽首求山中之人書遠郵雨餘黃獨苗新抽
琅玕芝草弄春柔不歸負此巖壑幽龍江送別情悠悠
鄉人歌作商聲謳

明詩綜

按魯在史館潛溪稱其補苴罅漏之功最多當議禮
而考文較損益於錙銖其所長蓋不在吟詠詩稿失
傳僅此一首以人存詩可也黃道士者雙井人涪翁
八世孫九宮山在興國真牧子張道靖鍊丹之所明
太祖平江漢黃道士迎於鄂渚應對稱旨後召至南
京設燕享之及還魯送以詩

送曾舜隣應貢之京

明周謨

多君我知己磊落吾邦賢聰明稟天賦學業成家傳一
簞食一曲肱泮水辛勤三十年朝經暮史不釋手讀書
愈多心愈堅皐比講論眾莫先古今成敗如目前詞源
滾滾匯百川浩氣直與蒼 連惜哉豪俊苦不偶驥足
反逐奔塵後劉蕡下第我登科一得先君顏頗厚我從
謝仕南歸日握手忘年交愈密弄吟風月嘯且歌濁酒
茅簷幾朝夕今年貢次君應召出門便向征途笑驂
遲志鳴春風明珠離海光先耀綠楊裊裊青絲條沙頭

旭日明征袍長安路入五雲去知君到時秋正高天下
英才集都會彤墀接武皆時髦崇正說書先列席明光
起草快揮毫文章有價南金重願君一釣連六鰲願君
一釣連六鰲捷音早聽吾東臯

東臯詩集

冰江行贈魯北園應教維揚兼東鄭玉泉

明朱瓚

天風吹落梅花片瑤峯玉樹參差見河橋酒價重如酥
百錢一飲寒猶戰呼觴色取壯士遊入口桃花透霜面
旋融春室藹高歌激散冰江曳長練魚龍不驚風浪眠

扁舟南下逾奔電咫尺金陵醉裏過恍惚瓊花望中見
先生抱璞三十年恥效荆人作三獻先生鼓瑟妙絕倫
屐聲不解竿門薦綠綺此去逢知音臯比一擁環羣彥
君不見伊川門外雪餘尺游楊二子寒山立又不見明
道堂中風襲人一月坐化朱光庭師道久不作善人就
彫落先生行矣朝庭山嶽丁寧東魯道南時樓船載書
歸莫遲秋風鹿鳴行在邁驥尾蠅程賴千里歸時馬報
玉泉子中峯作詩寒乃爾何當共醉都門春看花躍馬
從渠擬

墨泉集

練中丞遺裔歸淦并序

明謝肇淛

自金川門之變練公子寧以御史大夫抗節死闕下
闔門荼毒獨有侍媵抱匝歲子匿民間得免展轉入
閩爲人傭保六世孫綺者爲新寧陳孝廉掌書記萬
歷戊戌孝廉計偕入浙有江右楊生應祥同舟先一
夕生夢練公持刺謁己心異之比入孝廉船見書記
侍側雅皙不羣指問何姓答曰練生心動叩之曰得
非吾里練中丞後乎綺不應而涕淚滿面生益疑駭
窮詰之具得其狀亟以百金爲贖孝廉不受遣綺綺

不肯行日以死殉國人臣之恆且九族赤矣歸將何
爲生益賢之歸家具白當事者以幣來聘授以衣巾
俾奉公祠官爲置田廬百畝一時聞者莫不歎息泣
下以爲天道有知云

燕山日黑黃塵起金川門外鼓聲死長樂宮爲瓦礫場
殿庭流血成海水御史大夫練子寧手持三尺干雷霆
覆巢自分無完卵一門百口歸冥冥事去人亡二百載
蘆荻蕭蕭餘故壘長陵松柏已十圍孤臣遺骨今安在
釣龍臺下水可楫新寧城東山巖巖灌園誰能識法章

備肆猶堪藏李燮一日天迴地轉時千金購出練家兒
若敖之鬼終不餒行路聞之皆歔歔我登鍾陵山遙望
石頭城寧爲孝儒死不作陳瑛生爲君慷慨終一曲悲
風颯颯江波綠

小草堂集

戲魚堂石刻歌

國朝

施閏章

南山有時平何況南山石剝瓊刻玳良可憐尤物摩挲
成弃擲請君且勿誼聽歌戲魚堂御史風流劉次莊謫
居江畔歌滄浪臨池築室好心眼法書鈎勒窮微茫俯
駕潭州方絳帖寸紙片石稱琳琅魚父何萑萑遶檻各

成行叢篁夾古木林壑交清光隄傾石泐竟何往野水
東鹵空夕陽君不見周宣石鼓刻爲白嶧陽秦碑踣已
久填橋甃壁半沉埋雨剝雷轟恣擊掇礮火摧燒琬琰
文馬蹏蹴蹋龜龍紐負郭東山百戰餘城市凋殘物銷
朽苦心搜索抉泥沙隻字斷文無一有翻天覆地海揚
塵古來萬事終沉淪於乎古來萬事終沉淪醉看江上
捕魚人

愚山集

大雪適松筠主人赴培山莊索租走筆戲之兼速

其歸也

國朝

王泰牲

天道燠寒不可測昨日南風今日雪茅屋人家正閉門
廩空瓶罄指徒嚙老天胡不撒作鹽野菜不可連根喫
老天胡不飄爲綿做襦亦可補鶉結紛紛壓戶復填階
黃雲低處炊煙絕更來堂上主人翁持籌不貸面如鐵
婦無完裙兒無履黃牛穀棘當門蹶佃君之田負君租
低頭無語空嗚咽何人久儲經濟才何人實有蒼生責
我食君門愧無補願效馮驩空反薛呵凍作歌天欲昏
寒風怒號紙窻裂

知稼軒

省寓答客

戟門列柱朝啼鳥凌晨往伺返已晡案牘高堆紛列臚
病眼披校逾模糊予手拮据口卒瘡漫將亥豕噴吏胥
幸不軌法徒區區文網誤觸民其愚桁楊鐵索滿庭除
對之往往廢殮舖欽哉何緣釋無辜有客嗤我懦且迂
高才捷足真良圖不然何以金紫紆讀書不讀律何歟
致君堯舜無他途峩冠繡服美且都彼民自不愛皮膚
子奚爲者鞭用蒲毋乃姁嫗非丈夫庖人受命烹生魚
安能反令遊江湖耽耽雄視虎負隅尺筮寧獨爾羊驅
視其後者行且屠我爲謝客口囁嚅方今

聖主豈有諸禹下車泣湯網疎武健周內胡爲乎時清尙憶
我生初麟遊於圃鳳鳴梧豺狼匿跡走狸狐遍野桑麻
盈畝芋熙熙穰穰樂有餘梗化寧必遺魚鳧文翁治蜀
垂嘉謨入則橫經出荷鋤喁喁舞巷且歌塗安用火烈
鑄刑書民良孰謂古今殊我本儒臣厠石渠一麾出守
洵濫竽二千石久忝厚糈至今家無擔石儲瘡痍忍覩
僵我衢拊摩乏術心如痛行當自劾歸田廬詎待秋風
肥蓴鱸客不復語但長吁退爲巴曲歌嗚嗚

知稼軒

干思寶同學邀遊東山諸勝

國朝 潘安禮

金水溶溶江漲闊玉山轟轟春蕪沒中丞遺跡幾何年
流韻東山渺漻沈松杉合沓隱雲窩待月歌殘苔蘚拂
平生山水興不孤諸君迺肯相招呼冥心欣賞得真契
放懷晤語倒清醕洗墨池塘人已遠惜陰事業我全疏
游絲白日裊千丈梔子棠梨大於掌上方明月影蕭寥
滿眼歡塲歌慨慷酒闌夜靜獨歸臥潮音颯颯天風响
禮堂遺稿

臨江戲魚堂帖歌

國朝 翁方綱

西江古帖誰著稱我聞清江與廬陵廬陵之帖久散佚

清江卷帙尙可徵此皆祖彌閣前本不比絳汝滅與增
辰申相隔一百載閣帖初刻在淳化三年壬辰至
是臨江再翻爲元祐七年壬申皇祐

却想蕭殿丞清池蓄魚鬪於物堂堂策策交蒲菱長沙

侍御意忘謫築堂伐石摹繡繪呂和卿本那易得王侍

書目相然鷹爾時郡邑爭拓致江空壁響傳登登大觀

大清樓未啟臨摹初見長沙僧江左風味誰貌得詩家

比擬奚愛憎元遺山詩詩家亦有長沙帖莫作
宣和閣本看正用東坡跋潭語後來一

例啣瘦媚洗出前輩看飛騰劉潛夫云潭絳
大瘦臨江大媚十卷釋文

頗訂誤二王別軸猶絳稜百年故物逮淳祐鋪敘亦到

廬陵曾江山秀氣非一藝往歲權過屢歎興東山尙聞

堂址在生徒倘一弔古能荒煙殘礫豈易忽或恐光怪

雲霞蒸覃溪詩抄

贈洪金鼎文學善醫所著有一盤珠

國朝 李作相

君子如春風所至物物生造化同歸一呼吸轉神明衛

生如衛道楊墨慎權衡吾愛子洪子調氣如調羹不假

籠中參與琴不植門下桃與李但願蒼生勿天札飲醉

便復參元始吁嗟乎望君一跳出蓬壺解使羣生痼疾

蘇手植人間金井橘家有軒岐素問書

醒園詩戲

東山待月歌

國朝 楊殿梓

夕日欲入羣峯紫清磬一聲白雲裏穿雲深山山轉深
滿徑風林落松子林間曾起讀書臺名賢勝跡空蒿萊
商量舊雨幾人在尙憶軒窗臨月開我來山中待山月
幽興還因山月發山月未上山氣寒山中猿鳥亦愁絕
呼童竹葉傾芳尊蕭然萬籟俱無聞心賞一失不再得
拚飲直欲從宵分少焉月出東山上水鏡澄鮮宛相向
愛月添殘勸月杯入夢瑤華清斗悵

雨厓詩草

贈劉淳安明府世寧

國朝 雷 鉉

在昔蔚州敏果公耳聞嘉定治聲隆寄詩千里勤獎勞
未及謀面精神通况吾與子有夙契文章道義相磨礪
愛民愛士如愛己豈徒兩袖出清風勉哉無斁善思古
淳安舊令海剛峯鳳凰千仞桐百尺莫疑矯矯是孤踪
翠庭詩抄

黃勉齋祠

國朝 譚尙書

雲霧不開陰雨連春江直欲沒原田禾葉青青看不見
米價日貴升卅錢大屯小販爭閉致利析秋毫忘食睡

稱貸子本謁隣翁黃勉齋祠爲市肆時有假此賣米者箕簸斗

量眸空瞠糠飛秕落座凝塵夜靜聲喧招蕩子呼盧院

落到天明憶公當日宰茲土綱米代輸憐民苦一朝疏

奏死復蘇千載陳牲歌且舞况復得近聖人居春蘭秋

菊伴琴書如何一塊乾淨地忍使商賈爭贏餘我昔曾

披宋史傳臨川饑賑意綿纏後來皂蓋漢陽過客米倉

儲周急偏由來慈惠本性天恤患救災不勝情卽今庚

癸呼莫應九原可作心怦怦子罕餼鍾無望矣豆區分

糴應不鄙爲告輕猥乳臭兒金錢漫擲畱售米春草堂詩抄

岳武穆碑歌

國朝

劉學瀾

武侯出師表睢陽聞笛詩傳文卽以傳其志文生於情

情見詞趙家少保昭忠節半壁山河好護持劍淬成花

常耀彩弓開似月共驚奇以少擊衆衆披靡盜兵赤子

沸潢池虔州之役民安堵得請於帝從寬施撫綏保障

多此類軍無見糧士忍饑崇德猶將十世宥莫須有事

忍加之孱王不灑新亭淚榮河溫洛非故基南人自南

北自北湖山歌舞忘其悲壯哉虎臣何矯矯二聖若返

事可疑名將工詩匹競病一韻吟就百代思石猶可轉

心不轉千古血誠珍此碑 聿修堂稿

觀西賓董慎齋書壁 名逢昌 國朝 李昌昱

名士擅技不可窺
懔然畏聽齊門吹
君今惜墨勝惜寶
千金一諾肯輕貽
撇如干將出深匣
礫如美玉藏山輝
藝逢真賞有真契
下和薛燭兩無違
辱君爲我莅講席
有時興到雲煙飛
九天咳唾落珠玉
腕底神光何陸離
胸中一瀉注溟渤
下筆颯颯風雨隨
虛室生白忽天冥
晴空翻影來旌旗
舞陽小子已色變
伊予航此繇書癡
何須燕臺摸周鼓
卽此岫嶠睨禹碑
一回摩索 李昌昱
十日坐臥古所宜
燕寢凝香張素壁
懶讀史籀 杜陵詩